



理學叢書

陳
獻
章
集

下

理學叢書

陳獻章集

孫通海點校 下

中華書局

卷五

七言律詩

與友約遊仙井

仙井會容雙眼到，病軀須着一筇扶。春風有客來相問，何日扁舟進所如？世道難交終索寞，幽居擬卜只虛無。憑君寄語山靈道，欲傍啼猿借一區。

馬貞卜築圃中，與容貫同處

何處有花堪結椽，溪邊園裏樹相連。一齋一榻同燈火，江草○江花自歲年。元亮高棲須避俗，巖青異骨合成仙。東風兩岸黃鸝語，我亦中流坐我船。

○ 草，林本、高本、蕭本作「水」。

自斗岡還，至汾水江值暮

歸舟欲背南風發，別棹初開落日斜。
杜曲寄聲憑驥子，是日，景陽有信促歸。
武陵回首惜桃花。東遊西泛經旬日，揮翰留詩到幾家。
滿眼却愁歸路黑，時從野老問江叉。

弔厓

天王舟楫浮南海，大將旌旗仆北風。
義重君臣終死節，時來胡虜亦成功。
身爲左衽皆劉豫，志復中原有謝公。
人衆勝天非一日，西湖雲掩鄂王宮。

子陵四首

誰將此筆點行藏，真有乾坤日月光。
三尺羊裘幾銖兩，千秋龍袞共低昂。
客星天上何須急，老腳人間不浪長。
留得先生在台輔，不知東漢可陶唐？

羊裘不返道終疑，玉帛雖來事可知。
天下君臣光武召，世間膾炙子陵碑。
故人不改狂奴態，一事堪爲百世師。
九鼎漢家從此重，聽歌山谷老人詩。

- 胡虜，原空二格，據林本、高本、蕭本、何本補。
○ 高本第二首至第四首題吊子陵。

桐江秋水來天地，照見千年老鳳還。太史直書形迹外，先生猶在是非間。交情此去投當寧，年事何勞列從班？欲向東吳問遺老，江湖容有此翁閑。

先生如此亦天民，高坐桐江一水濱。却到陵夷排亂賊，方知名節是忠臣。白鷗自去江湖遠，黃紙何來道路頻？往往見人東廡下，傷心一代帝王真。

讀張曲江撰徐聘君墓碣四首

杜陵煙艇曾來否，相國銘章今在亡。千古我能生感激，一碑誰可借輝光？江波自映蒲輪返，原草還沾絮酒香。事異鑿坏終遠去，鴻冥天濶道之常。

桓靈而下使人悲，却憶陳蕃在郡時。何處公車還欲召，平生此榻竟奚裨？事機成敗我當算，天命去留人得知。萬古江山一回首，風清月朗聘君祠。

知心未問陳蕃輩，欲起先生在帝桓。自古山林輕祿位，至今朋黨惜衣冠。尋常笑語諸公撫，七十支離一老看。誰道開元張相國，重磨碑碣寫心肝。

一木能支大厦顛，棲棲徒只喻當年。身垂白髮西山裏，光射青牛北斗邊。信史只今文獻碣，清風何日豫章傳？狂歌亂耳不足獻，依舊生芻置墓前。

西山驛晚望

晚來花雨濕詩囊，獨上郵亭望大荒。
南盡海旁諸郡淺，西來天上一江長。
漁歌落日還孤艇，樹隔啼鶯背短牆。
料理憑高非一事，樽前誰與共平章？

秋江漫興

能傾瓦甓深深酒，不盡秋江短短篇。
閒弄孤舟移白日，明開兩眼看青天。
鷗遷遠渚眠何處，雲颺高風落此川。
野老隔波頻問訊，可能無意向神仙。

送羅養明還江右二首

長寄湖西夢裏身，扁舟春早忽相尋。
乾坤自古悲難合，伯仲而今契亦深。
草色正催公子醉，花枝不稱老年心。
何須袖却鴛鴦手，更向滄溟問我針。

懶作人間賣卜仙，紅蕖浪裏枕書眠。
詩篇到老絕求世，酒甕逢春不愛錢。
鷗鷺一羣清似雪，江湖諸子遠如天。
扁舟忽報金牛信，也得江花對惠連。

村中卽事

山風處處聞松花，江市日日來魚蝦，高田一弓走獵犬，灌木幾株叢老鴉。正逢元宵市燈好，亦有雜劇村鼓撾。野老西疇急春事，長揖縣官歸縣衙。

曉枕過金洲戲作

行人拍手笑天公，十月江湖未朔風。旭日上天纔半赤，晴霞照水忽殷紅。注目九江來艇急，回頭三老著篙慵。何須却走蒼梧道，不是天公也笑儂。

清明前三日，有懷亡友伍光宇無子

先生英骨葬蓬萊，幽思憑高不易裁。荒歲無窮春易老，清明將近雨還來。皇天自失包胥定，泉壤誰興伯道哀？尋樂齋前數株樹，月明空有鶴飛回。

禱雨，呈縣主丁彥誠

峰頂爲壇五土升，皇穹端合享精誠。雨聲先到玉臺寺，雲氣初蒸綠護屏。野老分錢須一虎，病夫獻茗走諸生。年豐我欲招神貺，絕壁高鐫令尹名。

奉陪趙提學厓山慈元殿弔古

信國諸臣近有碑，一陵瀕海尚堪疑。荒山野水無人到，落日輕風送我旗。天地幾回人變鬼，風波萬里母將兒。萋萋芳草慈元下，邂逅漁樵問舊時。

李德孚輓歌二首

此翁白髮已垂肩，猶借滄波十載眠。德孚己丑偕予自京師歸，不復出，至是十年而卒。一舸載書同載酒，幾家留藥更留錢。山陽笛奏西樵月，西樵，南海山名。余曩與伍光宇同遊，後有西樵山感舊詩，卽此山也。薤露歌傳大石篇。大石，卽德孚所居村名。誰道人生只如此，兩行衰淚落江煙。

別時已動東遊興，別後還深永訣悲。夫子春秋能六十，故人涕淚不童兒。身如南郭人間老，家有文溪地下師。修短未知誰○喜戚，天涯孤影日淒其。

題莊定山詩集

春風一曲有霓裳，不落人間小錦囊。今代名家誰李杜，先生高枕自羲皇。乾坤兀兀中流柱，風月恢恢大雅堂。莫道白沙無眼孔，濯纓千頃破滄浪。

○誰，高本、何本作「人」。

浴日亭，次東坡韻

殘月無光水拍天，漁舟數點落前灣。赤騰空洞昨宵日，翠展蒼茫何處山？顧影未須悲鶴髮，負暄可以獻龍顏。誰能手抱陽和去，散入千崖萬壑間？

扶胥口書事，借浴日亭韻

早春約我扶胥口，今日進舟黃木灣。使君已去漫留諾，水國獨吟空見山。老向煙波真得地，晚來風日更開顏。明朝去覓南川子，與話平生水石間。南川子，林光也。

宿欖山書屋

一片荷衣也蓋身，閉牕眠者乃何人？江山雨裏同歌嘯，今古人間幾屈伸？長與白雲爲洞主，自栽香樹作齋鄰。山中甲子無人記，一度花開一度春。

別欖山

羅浮山色眼中來，老子心情不易裁。高浪不驚南海舶，白雲聊共欖山杯。未知竹徑留人否，那問天公著雨催。主人更道秋來好，收拾黃花待我回。

餘興

何處秋聲入短琴，江邊蕭瑟起楓林。空歌白雪兒童笑，不負滄波老子心。釣石摩挲雲氣暖，睡沙展轉月痕深。眼中昏嫁隨時了，只有牀頭鬻犬金。

陳冕來遊白沙，至仰船江遇石尤風，舟覆

中流幾覆程夫子，何況白沙門下人！賢輩何曾負天道，老夫正自怪江神。仁義幾回驚濶論，利名何處不通津。祇應歸拜庭闈日，棄置艱難不肯陳。

羅一峰挽詞三首

今我何敢私一峰，百年公論在兒童。要知此老如君實，更恐前身是孔融。青天白日人千古，五典三綱疏一通。天下何嘗乏知己，我言剛與定山同。

狀元文史少微星，翰苑爲官謾兩京。既有光華爭日月，那無描畫在丹青？表章細事憑諸老，悵望高風激後生。千秋欲與蘇徐並，湖水中央更一亭。

芙蓉城下白驃還，更見一峰何處山！晚覺神仙真妄誕，肯留精爽一追攀。高才轉盼交游內，元氣驚心宇宙間。此日迸空爲誰泣，衰齡何意向人寰！

杜阮看山容貫卜居之地。二首

曾於海上看羅浮，魂爽高飛未得收。一片好山還入眼，兩巡瘦馬更回頭。青浮竹杪岡連峙，紅浸花枝水曲流。君若卜居須卜此，澗邊黃髮是巢由。

數家種竹已成林，共有平生卜築心。草木總偷春色早，雲霞偏傍晚山深。鶯聲早赴山靈約，松蓋先分地主陰。欲置一菴三級土，結趺高榻對南岑。

代簡答伍郡主爲莆田林侍御求草書

閉門一病九十日，小草大草生荒蕪。山癯須愛老狂客，府主正逢賢大夫。藥裏君臣何處有，墨池風雨坐來無。禿管已馳林侍御，如今雪齒不還蒲。

東亭奉別憲副陶公

父老連村擁畫航，東亭西日引杯長。舊是宰官今憲副，後來新會古桐鄉。指揮戎馬能千里，表裏山河捍一方。太史但收能吏傳，昇平不必問耕桑。

蔣宗誼以厥考樵林摘稿及其所著續宋論見寄，代簡奉答

江右詩書不乏賢，君家父子盡堪傳。樵林一摘幾千首，宋論直窺三百年。西漢文章遷史後，東吳風月定山前。乾坤隻眼知誰在，不是楊雄不好玄。

寄景星海上

妬花暝雨迷千里，隔水殘紅度幾車？夢破三更子規鳥，香來一樹木犀花。病夫老去頭如鶴，稚子春來髮似鴉。海曲傳詩意無盡，更期何處問丹砂？

次韻都憲朱公歸興

當日頭顱也未然，相逢休問買山錢。葛巾旋把陶潛酒，煙水將歸范蠡船。嶺表他年須遠略，桂陽秋月憶高眠。大臣去就嫌疑絕，還以嘉謨贊九天。

命孫田

- ① 度，林本、蕭本作「墮」。
② 遠，高本、何本、碧玉本作「領」。

新開斥鹵走通川，賸種烏穡益稅錢。士不居官終愛國，孫當從祖是名田。幸生天下承平日，屢見人間大有年。從此不須憂俯仰，茅齋向暖抱孫眠。

辛丑元旦戲筆

酒杯不與年顏老，詩思還隨物候新。分外不加毫末事，意中長滿十分春。棲棲竹几眠看客，處處桃符寫似人。除却東風花鳥句，更將何事答洪鈞！

與謝胖

柳市南頭望客舟，青山無語水東流。江花自對黃鸝晚，風雨偏催白髮秋。宇宙萬年開老眼，肝腸一縷入春愁。明朝日出波濤暖，依舊忘機對海鷗。

重贈張詡

風雨何人來款扉，滄江煙艇疾於飛。正將白首憐傾蓋，不管春泥得上衣。詩句與君爭出手，酒杯中我自忘機。傷心萬里滄溟水，又逐長風破浪歸。

茶蘼將開值雨

相看無語只沈吟，舊蕾枝頭已簇金。山雨不來昏晝景，東君容有妬春心。較量花品終何益，茫昧天機亦自深。明日陰晴還未定，一尊何急對花斟！

答梅繡衣見訪

一春煙雨暗荆扉，繫馬憐君共落暉。酒殘香風吹月桂，硯池清露滴茶蘼。水中郭索嗔皆是，屋上慈烏愛亦非。天道不移人自異，紅塵飛上釣魚磯。

陳庸被盜，張詡有詩唁之，因次其韻

三尺龍泉八尺身，書生膽氣欲驚人，亦遣偷兒知我輩，還將直道是斯民。風連蜀魄東方曉，雨洗茶蘼昨夜春，白舫望君心若渴，清川照我髮如銀。

曉枕

天時人事莽何窮，睡破山牕正惱公。幾點木犀三月雨，一聲蜀魄五更風。青春有限年年老，白髮無私個個同。莫共老人論甲子，閭閻稚子亦成翁。

詠鶴

孤山赤壁兩茫茫，疎柳江邊一草堂。塵世事多黃髮老，仙禽真對縞衣郎。風回蕙帳聲猶裊，月落芝田影漸長。却怕茶煙生一縷，等閒飛去碧沙旁。

憶鶴

孤山有月好西湖，只問湖中鶴在無。頸閣瘦軀三尺半，聲搖殘夢四更初。青田別去何由見，赤壁飛來不受呼。寂寞小齋誰是伴，賽蘭香裊舊團蒲。

謝惠壺

江上花邊到一壺，春風日日要人扶。數篇栗里乃何趣，五斗高陽非酒徒。春事無多花去眼，老形已具雪添鬚。醉鄉著我扶溪老，白璧黃金惠不如。

題閒叟

前村煙火熟朝炊，正是先生睡足時。身帶江山人在畫，目窮今古世爭棋。花邊擊鼓諸孫戲，竹下扶筇一鶴隨。應笑書生閒未得，白頭憂世欲何爲！

游心樓，爲丁縣尹作

城外青山樓外城，城頭山勢與樓平。坐來白日心能靜，看到浮雲世亦輕。高閣祇宜封斷簡，半年方許○讀西銘。乾坤一點龍門意，分付當年尹彥明○。

次莊定山清江雜興韻

家學華山一覺眠，圖書亦在枕頭邊。傍花隨柳我尋句，剩水殘山天賜年。竹徑旁通沽酒市，桃花亂點釣魚船。平生我愛孫思邈，自古高人方又圓。

中秋夜示江右李劉二生

勝會古來非獨今，兩生尊酒喜同斟。且看溟海中秋月，莫動匡廬半夜心。天道端須憐主客，浮雲不敢弄晴陰。堯夫獨愛梧桐上，萬籟無聲意自深。

辭修縣志

○方許，碧玉本作「剛好」。

○彥明，碧玉本作「彥誠」。按丁積，字彥誠。彥明或是別字。

吁嗟文獻荒涼久，著述圖經長老宜。令尹高才應處分，病夫何者敢聞知！嘗聞司馬開班范，直似家翁詔小兒。史體所關無大小，千秋麟筆寄宜尼。

寄李九淵

黃花開盡不持醪，更對黃花讀楚騷。江閣影流西日轉，海鴻聲引北風高。大寒天地猶堪出，垂老筋骸總厭勞。嗟我與君同甲子，鏡中誰讓長霜毛。

次韻梅侍御贈別

朱絃一弄白雲深，山水何人共賞音。老去布裘偏愛日，春來花樹不宜陰。兩端妬復雖天道，一體乾坤是此心。扶病寒江遠相送，古椰葉脫北風吟。

贈同遊馬玄真伍伯饒甥舅

江流東與海潮通，江去潮來今古同。巖洞風光詩卷裏，天涯歲月釣船中。老甥動止常隨舅，小友心情愛傍公。更約鐵橋窺險絕，筆牀琴匣未須封。